



STINAPA TA INFORMA

E HANDYMAN / BONERIANO DI PURA SEPA

Awe nos ta duna palabra na: Jonathan Pourier. Kolaborador di Parke Nashonal Washington Slagbaai. Jonathan tin 28 aña i e tin komo tarea pa tene tur material di e parke operashonal. E mester sa un tiki di tur kos pasobra tur kos semper mester ta kla pa uso direkto, manera e outonan, e generatorman i tur otro tipo di ekipo. Fuera di esei e mester perkurá ku tur edifisio i nan dak ta den bon estado. Jonathan a nase na Kòrsou pa motibu ku tabata spera komplikashon ku e parto i no tabatin suficiente fasilidat pa minimalisá e riesgonan e tempu ei. E ta kontentu di por bisa ku su mayornan si a nase na Boneiru, pues e ta konsiderá su mes un Boneriano di pura sepa. E kolaborashon ku e Rangernan ta tremendo, pa motibu ku aunke su tarea prinsipal ta e asina yamá 'mantenimentu preventivo', semper e ta pará kla pa yuda su koleganan ora trabou ta bira hopi pa nan den temporada di áwaseru. E ora ei e ta duna un man pa drecha kamindanan, òf tranké, òf limpia playa ku a susha. E no ta kasá pero e tin un yu muhé ku su amiga i huntu nan ta buskando un kas adekuá di moda ku nan pot forma un hogar. Te na e momentu aki nan kada un ta biba serka nan respektivo mayornan. E kas ku e ke kumpra òf traha lo bin despues di tempu, i tanten nan ta hür algu ku ta fit nan budget. E kas di su soño tin un forma di antaño, ku e murayanan diki ei ku no mester ta ni asina fini akabá, meskos ku ántes. Pasobra e murayanan diki ei ta tene bo kas dushi fresku, i e kasnan di ántes tin hopi porta i bentana. Lástimamente kasi bo no ta mira esei mas awendia. Riba e pregunta ku si ela wak hopi kambio atraves di tempu e ta kontesta afirmativo; "Si, awendia nos ta hasi muchu tiki uso di lokual naturalesa ta ofresé nos. Muchanan ni sa kiko un "fogon" (stof di karbon) ta, òf ta kon nan mester kushiná riba palu òf karbon. I lokual ta pió, nos ke laga naturalesa hasi lokual ku nos ke. Nos ta alehá nos mes di naturalesa i ora naturalesa ta bini serka nos, nos ke asta rabia. Por ehèmpel ora ku lora ta tribi di mishi ku nos pal'i fruta. P'esei nos mester siña nos yunan hopi mas di naturalesa. Nan mester siña di konos'é i respet'é." Si Jonathan por a disidí pa un solo dia kiko mester pasa na Boneiru, e lo a hasi e leinan ku ta protehá naturalesa mas severo. "Den temporada ku turtuga ta brui lo mi prohibí e akseso na e playanan, i tambe por hasi algu ku e kantidat di biaha ku un turista tin mag di sambuyá pa aña. Pasobra ni kon bon nan ta purba di evitá, tòg nan ta dañá e refnan di koral un tiki. Pero no asina severo manera por ehèmpel na Cuba" e ta agregá lihé. "Pa kasualidat mi sa ku einan ta na un par di sitio so nan tin mag di sambuyá. Bon mirá lo mester ta asina ku tur sambuyadó mester pasa un tèst tur aña pa muestra ku ainda nan sa ta kon kouteloso mester anda ku nos ref di koral".

Skirbí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru